

Evening Dogri News Bulletin, 08 April 2024

इवनिंग डोगरी न्यूज़ बुलेटिन

समे .18:15 Hrs

Headlines

- 1 जम्मू-कश्मीर च लोकसभा चुनावं दे पैहले ते दुए गेड़ लेई प्रचार अभियान जोर फगड़ा करदा ऐ। प्रधानमंत्री मोदी होर 12 अप्रैल गी उधमपुर च ते कांग्रेस नेता राहुल गांधी होर ईद दे बाद जम्मू च रैली करडन।
- 2 प्रधानमंत्री होरें आखेआ ऐ जे देसै च हर इक जनजाति परोआर दी जिंदगी च सुधार करना मोदी दी गरंटी ऐ।
- 3 कांग्रेस पार्टी नै अपने घोषणा पत्र दे बारे च प्रधानमंत्री ते बीजेपी दे वरिष्ठ नेता नरेंद्र मोदी हुंदे बयान गी लेइयै चुनावs आयोग गी शकैत कीती ऐ।
- 4 मुख सचिव अटल इल्लु होरें प्रदेश च नशीले पदार्थे दी रोकथाम लेई एन-कार्ड दी प्रदेश स्तर दी 9मीं बैठक दी प्रधानता कीती।

<><><><><><>

ते हुन खबरें दी तफसील कन्नै श्रुति खजूरिया।

<><><><><><>

Campaign

बक्ख-बक्ख सियासी पार्टिएं दे बड़डे लीडर मुख दे केइएं हिस्सें च लोकसभा चुनावं च अपने-अपने मेदवारें दे हक्कै च समर्थन करने लेई रैलियां करा रदे न। भारती जनता पार्टी दे वरिष्ठ लीडर ते प्रधानमंत्री नरेंद्र मोदी होर 12 अप्रैल गी जम्मू दे उधमपुर जिले च ते उत्तर प्रदे दे मुखमंत्री योगी आदित्यनाथ होर 10 अप्रैल गी कठुआ जिले च चुनावी रैली करडन। दुई भेठा कांग्रेस पार्टी दे

वरिष्ठ नेता राहुल गांधी ते प्रियंका गांधी होर अपने मेदवारें दे समर्थन च जम्मू च रैलियां करडन। मेद ए जे कांग्रेस पार्टी दे बड्डे नेता अगले हफ्ते प्रदेश दे दौरें पर औडन। उधमपुर लोकसभ सीट लेई पैहले गेड़ तैहत 19 अप्रैल गी ते जम्मू संसदी सीट लेई दुए गेड़ तैहत 26 अप्रैल गी वोट पाए जाडन। बीजेपी नै दो बारी दे सांसद ते केंद्री राज्य मंत्री डॉ. जितेंद्र सिंह होरें गी उधमपुर सीट लेई चुनांस मैदान च तोआरेआ ए ते दुई बक्खी कांग्रेस नै बी 2 बारी सांसद रेई चुके दे चौधरी लाल सिंह होरें गी इस सीट लेई अपना मेदवार बनाया ए। ताई जम्मू लोकसभा सीट लेई बीजेपी नै मजूदा सांसदें जुगल किशोर शर्मा होरें गी ते कांग्रेस नै रमन भलला हारें गी चुनांस मैदान च तोआरेआ ए।

<><><><><><>

PM-Chhatisgarh

भारती जनता पार्टी दे वरिष्ठ नेता ते प्रधानमंत्री नरेंद्र मोदी होरें आखेआ ए जे मुख्य दे हर जनजातीय परोआर दा जीवन बेहतर बनाना गै मोदी दी गरंटी ए। अज्ज छत्तीसगढ़ दे बस्तर संभाग दे आमाबाल गांस च इक जनसभा च प्रधानमंत्री होरें आखेआ जे लोकें दा सुखना गै मोदी दी गरंटी ए। उनें आखेआ जे उंदा मकसद मुख्य गी विकसित ते हर परोआर गी समृद्ध बनाना ए। प्रधानमंत्री होरें आखेआ जे पिछले 10 बरें च केंद्र दी भाजपा सरकार नै गरीबें दे कल्याण आस्तै केई योजनां बनाइयां न। केंद्र सरकार नै गरीबें गी उंदा हक्क दिता ए। पिछले 10 बरें च मुख्य दे 25 करोड लोक गरीबी थवां बाहर आए न। मोदी होरें आखेआ जे कांग्रेस सरकार दे शासन च भ्रष्टाचार मुख्य दी पंछान बनी गेदी ही।

<><><><><><>

MP-Rahul

कांग्रेस नेता राहुल गांधी होंरें मध्य प्रदेश दे सिवनी जिले दे धनौरा च इक जनसभा गी संबोधित कीता। उनें आखेआ जे इस मुख्य ते धरती पर पैहला हक्क जनजातीय लोकें दा ऐ। राहुल गांधी होंरें आखेआ ऐ जे कांग्रेस पार्टी इनें लोकें गी आदिवासी आखदी ऐ। दुई भेठा बीजेपी, प्रधानमंत्री नरेंद्र मोदी ते अमित शाह होंरें इनें गी वनवासी आखदे न। राहुल गांधी होंरें आखेआ ऐ जे इनें दोनें शब्दें दे पिच्छे 2 बक्ख-बक्ख विचारधारा न। उनें आखेआ जे जेकर ओह इस मुख्य दे पैहले हकदार न तां मुख्य दी धरती, जल, जंगल ते संपदा पर अधिकार ऐ, जिसले कि वनवासी दा मतलब जंगलें च रौहने आले लोक न ते उंदा जमीन, जल या जंगल पर कोई अधिकार नेई ऐ।

<><><><><><>

Congress-EC

कांग्रेस पार्टी नै अपने घोषणा पत्र दे बारे च प्रधानमंत्री ते बीजेपी दे वरिष्ठ नेता नरेंद्र मोदी हुंदे बयान गी लेइयें चुनांस आयोग गी शकैत कीती ऐ। नमीं दिल्ली च कांग्रेस दे वरिष्ठ नेता सलमान खुर्शीद हुंदे नेतृत्व च अज्ज इक शिष्टमंडल नै चुनांस आयोग कन्नै मलाटी कीती। खुर्शीद होंरें दस्सेआ जे कांग्रेस दे घोषणा पत्र च मुस्लिम लीग दी छाप आहले मोदी हुंदे बयान पर पार्टी नै ऐतराज जताया ऐ। उनें चुनांस आयोग गी आखेआ ऐ जे इस मामले गी गंभीरता कन्नै लेंदे होई एहदे पर कार्रवाई बी कीती जा। पार्टी प्रवक्ता पवन खेड़ा होंरें आखेआ ऐ जे युनिवर्सिटिं च प्रधानमंत्री हुंदे होर्डिंग, बीजेपी नेता ते केंद्री मंत्री राजीव चंद्रशेखर हुंदा कथित फर्जी हलफनामा ते सूचना प्रसारण मंत्रालय आस्सेआ किश यू-ट्यूब चैनलें पर रोक ज्नेय मामले बी पुट्टे न।

<><><><><><>

CEO-Ganderbal

चुनावी प्रक्रिया लेई प्रशासन दिएं तैयारिं दा जायजा लैने लेई जम्मू-कश्मीर दे मुख चुनांs अधिकारी पी.के पोले होरें गांदरबल च औंदे लोकसभा चुनां लेई तैयारिं दा व्यापक आंकलन कीता। गांदरबल दे जिला चुनांs अधिकारी होरें पावर प्वाइंट पेशकारी दे राहें चुनावी तैयारिं बारै योजना दे व्यापक ब्यौरे पेश कीते। उनें दस्सेआ जे जिले च लोकसभा चुनां गी मुक्त ते आजादाना ढंगे सिर करोआने लेई सब्बै लोइचदे बंदोबस्त कीते दे न।

<><><><><><>

Indian Navy Warship

रूस च तैयार कीते जाऱदे भारती नौसेना दे दऊं जंगी जहाजें गी इस बरे दे अखीरै तोहड़ी नौसेना च शामिल कीता जाई सकदा ऐ। रूस-यूक्रेन तनाजे दे चलदे इनें जंगी जहाजें दे तैयार होने च चिर लग्गा ऐ। नौसेना च शामिल होने दे बाद पैहले समुंद्री जंगी जहाज गी आई.एन.एस तुशील जिसले के दुए गी आई.एन.एस तमिल आखेआ जाहग। भारती नौसेना दे इक दल नै हाल च गै रूस च समुंद्री जहाजें दे निर्माण आले शिपयाई दा दौरा लाया ते इस परियोजना दा निरीक्षण कीता। एह दौनें समुंदरी जंगी जहाज मेद ऐ जे इस बरे बिलतरतीब अगस्त ते दिसंबर म्हीने नौसेना च शामिल कीता जाहग।

<><><><><><>

Somvati-Amavasya

मुख दे होरनें हिस्सें आला लेखा चैत्र म्हीने दी सोमावती अमावस्या दे मौके पर जम्मू-कश्मीर च बी श्रद्धालुएं दा बक्ख-बक्ख धार्मिक थाहरें पर रश दिक्खने गी लब्भा। सांबा जिले दी परमंडल थाहर केई सारे श्रद्धालु पुज्जे। श्रद्धालुएं पवित्र देवका च स्नान कीता ते शिवें दा जल अभिषेक कीता। लोकें परौआर ते समाज च एकता, भाईचारा, प्रगति ते खुशहाली लेई प्रार्थना बी कीती।

श्रद्धालुएं दी सुविधा लेई साम्बा दे जिला प्रशासन आस्सेआ लोडचदे बंदोबस्त कीते गेदे हे। इस मौके पर श्रद्धालुएं लेई मुफ्त लंगर बी लाया गेआ। इस मौके पर बोलदे होई श्रद्धालु नै आखेआ।

<><><><><><>

ते हुन बाकी दिएं खबरें कन्नै विजय बजाज।

CS-Drugs

मुख्य सचिव अटल डुल्लु होरें जम्मू-कश्मीर च नशीले पदार्थें दे गैर कनूनी कारोबार ते नशीले पदार्थें दी सप्लाई गी नियंत्रित करने लेई बकख-बकख सरबंधत पकखें बश्कार सब्बनें शा उच्ची सतह पर तालमेल गितै एन-कार्ड दी प्रदेश सतह दी सर्वोच्च कमेटी दी अज्ज 9मीं बैठक दी प्रधानता कीती। बैठक दी शुरूआत च मुख्य सचिव होरें इस बारे पैहली जनवरी गी लग्गी दी बैठक दरान लैते गेदे फैसलें पर कार्रवाई बारै जानकारी हासल कीती। उनें विशेष एन.डी.पी.एस अदालतां खडेरने सनें बकख-बकख जिलें च नशामुक्ति सुविधाएं दे विस्तार लेई प्रशासन आस्सेआ कीते गेदे हीलें बारै बी जानकारी लैती।

<><><><><><>

Drugs-Hot Spots

पुलसै आखेआ ऐ जे जम्मू च ऐसी 14एं थाहरें दी शिनाख्त कीती गई ऐ जित्थे नशीले पदार्थें दा मता गैर कनूनी कारोबार हुंदा ऐ। पुलसै शैहा च नशे दी कबैतु कन्नै निब्बड़ने लेई कीते जा'रदे बकख-बकख जत्नें पर बी लोs पाई। जम्मू दे एसएसपी विनोद कुमार होरें दस्सेआ ऐ जे इस बरे अजें तोहड़ी एन.डी.पी.एस दे 71 मामले दर्ज कीते गेदे न ते 85 तस्करें गी गिरफ्तार बी कीता गेदा ऐ। इंदे थमां बड़ी मती मात्रा च नशीले पदार्थ ते मुख्य तौर पर हेरोईन बरामद कीती गई ऐ।

<><><><><><>

Sanasar-Garden

जम्मू खिते दे रामबन जिले दी सन्नासर थाहर ट्यूलिप दे तकरीबन ढाई लकख फुल्ल खिड़े दे न ते एह फुल्ल ते उत्थुआं दी सुंदरता सैलानिएं गी आकर्षित करा'रदी ऐ। आकाशवाणी जम्मू संवाददाता दी रिपोर्ट मुजब सन्नासर आले ट्यूलिप गार्डन गी लोकें लेई खोली दिता गेआ ऐ। इस बारे 25 बकख-बकख चाल्ली दे ट्यूलिप उत्थे लाए गेदे न। इस थाहर होर मते सैलानिएं गी आकर्षित करने लेई गुलाब दे फुल्लें आला रोज़ गार्डन बनाने दा बी प्रस्ताव ऐ।

<><><><><><>

Market-Check

पुंछ दे डिप्टी कमिशनर होरें मीट, मुर्गे ते होरनें खाने-पीने आली चीजें दी बद्द कीमत वसूले जाने दिएं खबरें पर कार्रवाई करदे होई अफसरें दी इक टीम दा गठन कीता ऐ। इस दल च खाने पीने आली चीजें दे मानक ते सुरक्षा दी जांच सरबंधी मैहकमे, नापतोल मैहकमे ते खुराक ते बंड सरबंधी मैहकमे दे अफसर शामिल ऐ। एह दल औंदे नरातें ते ईद दे मद्देनजर गठित कीता गेआ ऐ। बकख-बकख टीमें पुंछ कस्बे दे बकख-बकख कारोबारी इदारें दा चानचक्क जायजा लैता ते केइएं गी कोताही बरतने लेई जुर्माना बी लाया गेआ। इस बारे बोलदे होई खुराक सुरक्षा सरबंधी मैहकमे दे असिस्टेंट कमिशनर तारिक महमूद होरें आखेआ।

<><><><><><>

Goswami

गोस्वामी गुरु नाभा दास महाराज हुंदा 452मां जन्म ध्याड़ा अज्ज उधमपुर च मनाया गेआ। एहदे च जिले दे बकख-बकख हिस्सें थवां श्रद्धालुएं हिस्सा लैता। इस मौके पर गोस्वामी गुरु नाभा दास महाराज हुंदे पर आधारित शोभा यात्रा कड्डी गई। एह शोभा यात्रा जंगलात दफ्तर, चबुतरा बजार, गोल मार्केट, रामनगर चौक, सलाथिया चौक, धार रोड थवां हुंदे होई नाभा दास मंदर सम्पन्न होई।



Rupee-Close

विदेशी मुद्रा बजार च अमरीकी डालर दे मुकाबले अज्ज रपे दी कीमत 83 रपे 31 पैसे पर बंद होई। 6 होरनें मुद्राएं दे मकाबले अमरीकी डॉलर दी ताकत दर्शाने आला डॉलर सूचकांक अज्ज 104 इशारिया 3-8 रेया।

